

ABSTRAK

BAHARUDDIN BIN MALEK. Doktrin Dosa Warisan Di Dalam Agama Kristian Dari Perspektif Roman Katholik: Suatu Analisis.

Kajian ini bertujuan menjelaskan tentang konsep sebenar doktrin dosa warisan yang meyakini kesalahan pertama yang dilakukan Adam dan Eve di dalam Eden menjadi punca kepada turunya dosa ke dunia dan semua manusia mewarisi dosa pertama tersebut yang menjadi tunjang akidah agama Kristian kini khususnya mazhab Roman Katholik.

Kesedaran untuk melihat sejauh mana relevan dan terbukti benarnya doktrin dosa warisan di dalam agama Kristian sebagaimana yang diyakinya dan apakah sebenarnya perspektif Kristian khususnya mazhab Roman Katholik tentang doktrin ini mendorong kajian dilakukan. Apatah lagi ia tidak pernah diajarkan oleh Jesus Christ dan ditambah pula pengasasannya menjadi realiti hanya lima kurun selepas "ketiadaan" Jesus Christ oleh St. Augustine. Hal yang sedemikian telah memangkinkan lagi penulis untuk mengupas tentang asas sebenar doktrin dosa warisan di dalam agama Kristian dari perspektif Roman Katholik yang dipercayai merupakan hasil rangkuman beberapa bentuk fahaman, amalan dan kepercayaan agama Yahudi dan masyarakat penganut agama Pagan yang mengelilingi bumi Palestine.

Untuk itu, kajian ini telah mengupas tentang latar belakang dan sejarah perkembangan agama Kristian khususnya selepas ketiadaan Jesus Christ. St. Paul yang diakui sebagai pengasas ke-2 agama Kristian telah dianggap sebagai pencetus kepada wujudnya doktrin tersebut yang mempercayai semua manusia adalah berdosa kerana menanggung dosa warisan (dosa Adam dan Eve) yang memerlukan seorang penebus untuk menebusnya. Manusia yang dikatakan layak untuk menanggung tugas sedemikian ialah Jesus Christ kerana beliau dipercayai hanya satu-satunya manusia yang suci daripada dosa warisan kerana beliau adalah *son of God*. St. Paul juga dikatakan sebagai orang yang bertanggungjawab merubah kedudukan agama Kristian daripada agama yang khusus untuk bangsa Yahudi sahaja menjadi agama anutan untuk semua bangsa ataupun universal.

Sebagai suatu pembuktian, kajian ini mengupas tentang asal usul doktrin dosa warisan yang dikatakan bukan berasal daripada agama Kristian. Polemik tentang kemungkinan manusia menanggung dosa warisan berterusan menjadi perbincangan hangat di kalangan penganut agama Kristian. Tidak kurang pula yang menolaknya sama ada secara sebahagiannya mahupun secara total.

Justeru, untuk melihat kedudukan doktrin ini dengan jelas kajian yang dilakukan cuba membuktikan doktrin dosa warisan di dalam agama Kristian mempunyai perkaitan yang amat rapat dengan kepercayaan-kepercayaan dan amalan-amalan masyarakat agama Pagan yang melingkari bumi Palestine dan

juga kepercayaan-kepercayaan dan amalan-amalan agama Yahudi yang merupakan agama yang paling rapat sekali hubungannya dengan agama Kristian.

Pembuktian yang lebih jelas dapat diperolehi apabila terdapat keterangan-keterangan di dalam Bible yang menunjukkan doktrin dosa warisan bukanlah ajaran sebenar yang berasal daripada Jesus Christ. Namun demikian penyelesaian bersama yang tegas tentang kedudukan doktrin dosa warisan di dalam agama Kristian khususnya mazhab Roman Katholik telah diambil melalui beberapa persidangan gereja yang jelas mengiktiraf doktrin tersebut sebagai salah satu tunjang akidah agama Kristian. Walaupun tindakan penyelesaian telah di ambil, pelbagai polemik masih timbul kerana doktrin tersebut amat subjektif bentuknya yang telah membuka ruang perbahasan yang begitu luas. Ini diakibatkan tiadanya asas yang kuat di dalam pembentukan doktrin dosa warisan, di samping bentuk sebenar doktrin itu juga yang masih kabur dari segi konsep dan falsafahnya. Apatah lagi bible Barnaba juga menolak kewujudan doktrin tersebut. Di tambah pula dengan pegangan agama Islam yang dengan jelas menolak keyakinan bahawa seseorang itu boleh menanggung dosa yang tidak dilakukannya.

Sebagai kesimpulannya, doktrin dosa warisan merupakan keyakinan akidah agama Kristian khususnya Roman Katholik yang cuba meletakkan hubungan kasih sayang yang berterusan di antara Pencipta dengan makhluk-Nya dan perolehan anugerah rahmat Tuhan yang telah hilang akibat perbuatan

dosa Adam dan Eve melalui pengorbanan satu-satunya anak Tuhan ataupun *son of God* (Jesus Christ) di palang salib demi untuk menebus dosa warisan manusia walaupun kedudukan doktrin tersebut sebagai tunjang akidah masih kabur.